

## HUNSRIK 1474

Haloo, hier is Solange Hamester Johann, fom Projekt Hunsrik

Tankpaarkheet

Tii woch wërt te Taach fon te Tankpaarkheet kefayert, was imer paseyert am 4° tonerxtach in noofëmper, iwer ti kans welt.

Tankpaarkheet is ti erkhënung fon en persoon fer yemant woo iim etwas nutsliches, en hilef ore en kefale ketuun hot. In en waytere sin, khan tas aach als prayter erkhënung fon situatsioone un kaape woo es leewe uns xon kep hot ore uns imer noch wayter kept.

Te famoose xraywer Charles Dickens hat mool kesaat tas mer solte iwer ti seechnunge fon te presënt tsayt noo tënke, woo ale mënxe in iwerflus hon, un net iwer tas unklik fon te ferkangne tsayte, woo ale mënxe meyer ore weenicher hate. Meyer mise Hërkot tanke wayl Eyer uns seechent mit fiil mee wii meyer ferlange tuun.

Tankpaarkheet an Kot fer tas Leewe, fer te Liipe, fer ti keleechenheet fer ales noch mool frix aanfange, fer ti wisheet woo Eyer uns kept, fer ti kraft woo in uns trin is un fer ti traume woo sich realiseere...

Un ti xwiirichkheete, ti xmërtse, ti treene un tas xtolpere sin was kleenes wën Hërkot imer pay uns is. Tankpaarkheet fer ales was meyer hon. Wëns tuu mit acht ti tetayls fon tayn leewe kenau aan kuke tuust, wërst tuu mee motiife fine fer tich se petanke, anxtat reklameere.

Tas leewe reflektiert wii tuu tas fiile tuust. Friite fiile, froyntxaft fiile un tankpaarkheet fiile. En leewe woo ploos kuutes xpiichelt, pringt aach kuutes tsurik fer tich.

Tankpaarkheet is yeete momënt fayre. Is fayre was tuu konkisteyert host. Un was tuu noch net konkisteyert host. Fayre was tuu host un was tuu wilt. Tas leewe fayre. Tas is en xeen form fer Tanke Xeen se saan.

Es sin net ti klikliche mënxe woo tankpaar sin. Es sin ti tankpaare mënxe woo kliklich sin. Tankpaar sin is ti khunst fer kuut tings aan se tsiye.

Woo mee meyer tanke tuun, soo fiil mee kuut tings tuut paseere!

Tesweche, winxe ich:

Tas khee uersache feele sole fer se khuse,

Tas khee hërtse feele sole fer se liipe,

Tas khee plets feele sole fer pesuuche keen,

Tas khee aarme feele fer uns umaarme un fertrike,

Tas khee aue plike feele fer uns naner aan kuke,

Tas khee momënte feele fer se leewe un

Tas khee tsayt feele sol fer kliklich sin un

Khee motiife feele sole fer se tanke!!!

Xeene kruus aus Thee Walt.